

Upernaviup eqqaani nunaqarfimmi Innaarsunni oqaluffiliornissamut Naalakkersuisut AIS15-imi 10 mio. koruuninik immikkoortitseqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Jens Immanuel, Siumut)

Akissuteqaat

(Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoq)

Siullermeerinnineq

Nunaqarfimmi Innaarsunni nutaamik oqaluffiliortoqarnissaa pillugu aalajangiinissatut siunnersuummut Naalakkersuisut qujapput, ilagiillu atorneqarsinnaasunik illuuteqarnissaasa qulakkeerneqarnissaanik soqutigineqatigalutit.

Siusinnerusukkut assinganik nalunaartoqartarnerani Naalakkersuisut nalunaartarnikuupput, nutaamik oqaluffiliortoqarnissaanik pisariaqartitsisoqartoq ilagiit isumaqarunik suleriaaseq tassaasoq palasi attavigineqassasoq. Tamassuma kingorna taassuma provsti biskopeqarfillu kissaatigineqartumik oqaloqatigissavai. Biskopeqarfiup tamassuma kingorna tamanna pillugu qinnuteqaat Namminersorlutik Oqartussanut nassitissavaa.

Taamatut kissaateqarnerni Ilagiit peqataatinneqarneranni nunatsinni oqaluffissanik iluarsaassinissami nutaanillu sanaartornissami suut pisariaqartinneqarnersut Kalaallit Nunaanni Ilagiit tamarmiusut ilisimasaqarnissaat suliassanillu tulleriinnilersueqataanissaat qulakkeerneqassaaq.

Nunatsinni illuutitut iluarsaanneqarnissaannik pisariaqartitsiviusunut tamanut nutaanillu sanaartornissamik kissaatit malinneqarnissaannut isumalluuteqartoqannginnera tunngavigalugu tamanna isigineqassaaq, taamaammallu Ilagiinni suleqatit suliassat attuumassuteqartut suleqatigalugit tamakku ataqtigisarnissaat pisariaqarluni. Innaarsunni nutaamik oqaluffiliortoqarnissaanik qinnuteqaat Kalaallit Nunaanni Ilagiinnut nassinneqarsimanersoq Naalakkersuisut ilisimasaqarfingilaat.

Aalajangiinissamut siunnersuutaqqaartoq Naalakkersuisut tamanna tunngavigalugu aallaaviummik tapersersinnaanngilaat. Innaarsunnili ilagiit oqaluffimmi suliassanut tunngatillugu inissaqarnerunissamik pisariaqartitsinerat Naalakkersuisut paasisinnaavaat, Innaarsunnili illumik assigiinngitsorpassuarnut atorneqarsinnaasumik peqarnissaanik kommunip erseqqissumik kissaatigisaanut atatillugu oqaluffimmi suliassanut pitsaanerumik inissaqarnissamik kissaateqarnermi periarfissaqartoq takusinnaallugu. Tamanna tunngavigalugu Naalakkersuisut allannguutissatut siunnersuummik uuminnga saqqummiipput.:

Oqaluffiup initaa Innaarsunnut naammattumik angissusilik ilanngullugu illumik assigiinngitsorpassuarnut atorneqarsinnaasumik sanaartornissamut 2014-imi ilassutaasumik aningaasaliinissamik siunnersuummik Naalakkersuisut saqqummiussinissamik peqquneqarnissaannik Inatsisartut aalajangiinissaattut siunnersuut.